

四庫全書

集部

欽定四庫全書

渭南文集卷二十三

宋 陸游 撰

姚平仲小傳

姚平仲字希晏世為西陲大將幼孤從父古養為子年十八與夏人戰臧底河斬獲甚衆賊莫能枝梧宣撫使童貫召與語平仲負氣不少屈貫不悅抑其賞然關中豪傑皆推之號小太尉睦州盜起徽宗遣貫討賊貫雖

惡平仲心服其沉勇復取以行及賊平平仲功冠軍乃見貫曰平仲不願得賞願一見上耳貫愈忌之他將王淵劉光世皆得召見平仲獨不與欽宗在東宮知其名及即位金人入邊都城受圍平仲適在京師得召對福寧殿厚賜金帛許以殊賞於是平仲請出死士斫營擒敵帥以獻及出連破兩寨而敵已夜徙去平仲功不成遂乘青騾亡命一晝夜馳七百里抵鄧州始得食入武關至長安欲隱華山顧以為淺奔蜀至青城山上

清宮人莫識也留一日復入大面山行二百七十餘里
度采藥者莫能至乃解縱所繫騾得石穴以居朝廷數
下詔物色求之弗得也乾道淳熙之間始出至丈人觀
道院自言如此時年八十餘紫髯鬱然長數尺面奕奕
有光行不擇崖塹荆棘其速若奔馬亦時為人作草書
頗奇偉然祕不言得道之由云

族叔父元燾傳

族叔父元燾名宥一字居安自山陰徙家餘姚性恭謹

純厚閉門力學不妄與人交尤好樂律每言樂所以成
人才今世所用皆胡部雖鄭衛亦不得聞況韶濩乎因
考按古關雎鹿鳴諸詩抑揚皆合音律時時自歌之中
正簡古聞者興起欲上書請用之鄉飲酒會疾病不果
所居瀕江一室蕭然數十年間几席書冊琴樽之屬皆
未嘗易好飲酒然不肯自釀或餽以家所醞亦辭不取
曰法不可也其謹如此有子洙登進士第為鹽官尉迎
養官舍期年洙卒元燾護其喪歸亦能自釋久之以疾

卒年七十與元燾同時有鄭從草者名鼎之丹徒人自
三舍法行已在鄉校能自刻苦口誦手鈔日常兼數人
然試有司輒黜從草亦不以黜故少怠終始如一日事
父篤孝建炎中客山陰遇寇從草欲奉父避之父不聽
從草乃束帶立床前鬻糜粥奉湯液悉如平時寇至則
迎門拜泣曰父老不能去惟哀憐之寇為感動乃署其
門使其屬勿犯終亂定父子俱得全年六十餘貧益苦
比卒衣衾不能具而一鄉皆推其賢云

陳氏老傳

會稽五雲鄉陳氏老年近八十生三子有孫數人皆業農惟力耕致給足凡兼并之事抵質賈販以取贏者一切不為耕桑之外惟漁樵畜牧而已子孫但略使識字不許讀書為士婚姻悉取農家非其類皆拒不與通室廬不妄增一椽器用皆朴質堅壯不加漆飾衣惟布襦帚取適寒暑之宜行之四五十年如一日子孫亦皆化之無違陳氏所居在剡渚山下地名曰南溪云陸子曰

予嘗悲士之仕者若苟名位而已則為負國必無負焉
則危身害家憂其父母有所不免耕稼之業一捨而去
之復其故甚難予先世本魯墟農家自祥符間去而仕
今且二百年窮通顯晦所不論竟無一人得歸故業者
室廬桑麻果樹溝池之屬悉已蕪沒族黨散徙四方蓋
有不知所之者過魯墟未嘗不太息興懷至於流涕也
聞陳氏事因為述其梗槩傳之庶觀者有感焉

紹興府衆會黃籙青詞

上帝福善禍淫雖各繇於類應大道回骸起死或俯徇
於哀祈敢露忱詞仰干聰鑒伏念臣等所居紹興府地
連三輔人雜五方任職居官當閭閻之太半鮮衣美食
昧稼穡之所從習俗莫還神明積譴方凶饑之薦至加
疫癘之相傑疾痛呻吟未及三醫之謁煮蒿淒愴已悲
萬鬼之隣念升濟之無方敢號呼而有請伏望少回洪
造一洗衆辜逝者脫泉路之冥冥生者安王民之皞皞
天職生覆地職形載敢忘夙夜之歸冬無愆陽夏無伏

陰永冀生成之賜

江西祈雨青詞

天惟至仁久寬水旱之譴吏實有罪仰累陰陽之和既
閔雨之厯時敢叩閭而請命伏念臣濫膺上指出使近
畿深惟冥頑固陋之資莫副惻怛丁寧之訓徒積勤於
夙夜冀無負於幽明然而風采不足以警服豪強惠愛
不足以撫綏鰥寡政媮愒日田疇曠陂澤之修訟積淹
時囹圄困析楊之繫務均力役而或蔽於所見思廣賑

恤而或緣以為奸既莫致於善祥懼卒罹於饑饉是用
諏辰之吉稽首以陳伏望推善貸之慈需曲成之惠雖
有司曠職宜伏雷霆之誅然比屋何辜流為溝壑之瘠
若復未回於洪造遂將絕望於有秋敢殫皇皇哀迫之
誠冒貢懇懇吁嗟之禱庶格九霄之澤少紓一道之憂
稼穡順成儻僅蒙於中熟里閭疾苦誓靡壅於上聞

謝雨青詞

旱太甚以是虞不遑啟處天蓋高而可叩思罄精誠方

祇祓於齋場已亟霑於膏澤尚懼豐凶之未決敢忘祈
報之交修仰企叢霄少回冲馭伏願哀黎民之匱食宥
衆吏之瘵官申敕有神更終大惠一穀不升謂謙豈勝
夙夜之憂三日以往為霖實賴乾坤之造

嚴州祈雨青詞

歲律肇新農功伊始居者慮陰淫陽伏之寇耕者懷旱
乾水溢之虞仰惟上穹職是元化俯遂羣黎之育式均
六氣之平敢即熙壇恭陳薄薦所冀歲豐民樂寬九重

宵旰之憂賦足刑清逭衆吏簡書之責敢忘惕勵仰對
生成

謝雨青詞

天九關之在上精誠可以徹聞雨三日而成霖枯槁為
之盡起恭陳薄薦冒貢丹衷伏念臣領此徧州迨今累
月上無以布宣寬大而逭屯膏之咎下不能撫摩凋瘵
而格解澤之施跼蹐靡遑吁嗟上訴敢謂鼓霄之應曾
無挾日之淹月離畢以示期山出雲而効職風霆下擊

澗壑交流井汲如初家享一瓢之樂粟儲可繼士寬半
菽之憂商旅通行道途鼓舞彼有遺秉此有滯穗方將
均惠於惇嫠冬無愆陽夏無伏陰更冀默消於疾癘敢
忘兢惕仰對生成

保安青詞

道垂光而下濟罔不興慈情至敬則無文惟當直訴伏
念臣少多罪垢晚之功能寓形寢迫於九齡定著遂階
於四品先世被追榮之典已冠三孤諸兒荷延賞之恩

例霑寸祿首坐滿盈之久自挺灾釁之來時涉夏秋疾
生經絡有藥必試靡神不祈呻吟之聲晨莫不絕惟歸
誠於洪造或少逭於往愆么然微衷亟以自列伏望曲
回聰聽俯佑殘軀俾毫及之餘生獲奠居於故社耕桑
安樂父子團欒天實無私敢汲汲希望外之福人誰不
死願熙熙須數盡之期

天申節樞密院開啟道場疏

得道者上為皇啓帝圖之廣大有德者得其壽當化日

之舒長率籲衆情虔伸善祝光堯壽聖太上皇帝伏願
三靈介祉九廟儲休無黃屋之心雖退藏於淵默如南
山之壽冀茂對於天祺

滿散道場疏

惟天其申命用休誕御無疆之厯有德者必得其壽共
輸歸美之誠敢叩梵宮仰申善頌光堯壽聖太上皇帝
陛下伏願頤神物外布澤寰中福祿萬年丕介龐鴻之
祉本支百世永奉詒燕之謀

天申節功德疏

得吾道而上為皇算自齊於箕翼有天下而傳之子福
方寢於華夷敢因震夙之期申致延鴻之祝恭惟光堯
壽聖太上皇帝陛下聰明時憲清淨無為黃屋非心共
仰堯仁之大玉卮為壽益瞻漢殿之尊光堯壽聖太上
皇帝恭願茂對昌辰丕承景貺以聖傳聖增光奕世之
休為天中天永享萬方之奉

又

得道上為皇誕受泰元之冊重華協於帝光臨孝治之
朝敢殫向日之誠仰祝後天之算尊號陛下恭願又新
湯德丕顯文謨日舒以長燕處益探於衆妙道冲而用
陰功廣被於羣生

瑞慶節功德疏七

有開必先天地肇開於景運無遠弗屆華夷畢效於貢
珍矧備邇聯敢稽壽祝皇帝陛下伏願誕膺戩穀端拱
穆清以八千歲而為春永御舒長之景十七百年而過

歷用符愛戴之誠

又

誕彌厥月丕昭震夙之期長發其祥共致厯鴻之祝皇
帝陛下恭願後天難老如日正中紹十二聖之睿謬開
三百年之景運金泥玉檢肇修稀濶之儀楷矢石磐永
享貢輸之盛

又

叨榮禁路千齡獲遇於聖明歸老故山一飯敢忘於君

父敬脩梵供仰祝堯年皇帝陛下恭願光照大千壽踰
時萬繼統燕無為之治御邦躋有道之長上際下蟠永
享化國舒長之日東封西祀嗣修太平稀濶之儀

又

節紀千秋實踵開元之盛神呼萬歲洊膺嵩嶽之祥顧
雖遯迹於丘園敢急馳誠於軒陛皇帝陛下伏願道極
高而蟠厚治咸五而登三碣石河源盡復輿圖之舊泰
山梁甫嗣修檢玉之儀

又

惟皇之極欣逢熙洽之辰於萬斯年共效厯鴻之祝敢
趨淨域薦控丹衷皇帝陛下伏願允叶帝心誕膺神策
化東漸而西被功上際而下蟠降德於衆兆民坐致唐
虞之治上瑞至千百所永符箕翼之祥

又

聖恩念舊猶叨四品之崇景運開先敢後萬年之祝皇
帝陛下恭願當宁撫盈成之業垂衣紹積累之休朔易

南訛綿鋤耰於率土東漸西被會玉帛於中朝

又

恩霑遺老幸聯上雍之班身遇明時敢後祝堯之請皇
帝陛下恭願乾端廣大日轂正中髦鬯奉九譯之琛農
扈告三登之候應帝王之運故聰明睿智足以有臨集
天地之祥皆算數譬喻所不能及

祈雨疏

九秋伊始百穀將登念零雨之稍愆率羣情而致禱仰

惟慈蔭曲鑒丹誠三日為霖俯慰雲霓之望大田多稼
上寬宵旰之憂

謝雨疏

諸佛願心本常存於澤物衆生業果或自召於凶年民
愚無良吏情不職駭驕陽之作害閔零雨之弗時內罄
寸誠方吁嗟而遍禱起瞻四野已枯槁之一蘇自惟莫
格於太和乃至上勤於慧力敢忘祗報用畝鴻慈

道宮謝雨疏

上帝至仁本不忘於澤物下民胡罪幾坐致於凶年由
官吏之情偷致政刑之疵癘驕陽作害零雨弗時內罄
寸誠方吁嗟而仰禱起瞻四野已枯槁之盡蘇自惟莫
格於太和廼至輒干於鴻造敢忘祇報用畚好生

嚴州祈雨疏

倬彼雲漢尚愆霖雨之期害於梁盛俯劇淵冰之懼敢
輸丹悃仰叩真慈冀占離畢之祥少逭屯膏之咎

又

時雨少愆上勞宵旰詔音亟下恭致禱祈敢冀

洪恩慈誕

敷惠澤

又

龜占墨而尚違凜有屯膏之懼龍蟠泥而未舉方繫解

澤之施冀軫

鴻覺

慈曲成樂歲俯慰闔境雲霓之望上寬

淵衷宵旰之憂

嚴州施大斛疏

旱魃為虐念莫釋於衆憂飯香普熏敢恭陳於淨供伏

願雲從龍而效職月離畢以告祥解澤亟行屯膏一洗
如來施無量食既靡間於聖凡史臣書大有年庶上寬
於宵旰

嚴州謝雨疏

時雨愆期方軫焦勞之慮

天心佛慈

從欲遽蒙霈澤之施敢

擇良辰敬伸昭報

嚴州謝雪疏

萬邦屢豐幸際中天之熙運平地尺雪鬱為嗣歲之嘉

祥敢忘

淨供薄薦

之

修陳

少謝

覺慈叢霄

之貺尚祈

垂佑洪造

益介純禧

嚴州久雪祈晴疏

時雪屢應已占嗣歲之登春氣未和寧免祈寒之怨敢

趨

秘梵

宇仰叩

真覺

慈冀日麗於層霄俾民安於比屋上寬

盥食俯慰輿情

渭南文集卷二十三

欽定四庫全書

渭南文集卷二十四

宋 陸游 撰

法雲寺建觀音藏殿疏

補落伽之道場秦蕪已久修多羅之妙典函匱僅存先
師每志於經營四衆亦思於協助天時默定佛事將成
伏望巨公大人居士長者深戒著鞭之後共合浮圖之
尖庶得萬瓦鱗差修梁虹舉紺容輝日梵唄陵雲結難

值之勝因作無窮之壯觀

開元寺重建三門疏

巍然古刹實居天府之喉衿卓爾高閎復為一寺之眉
目歷數百載極祇園之盛乃七十年猶劫火之殘伏望
大發積藏亟成鉅麗粲髹丹於久廢偉扁榜之一新雨
霽塵清碧瓦勢凌於霄漢霧開日出金鋪光射於康莊
還壯觀於承平垂美名於不朽

安隱寺修鐘樓疏

金鐘大鏞蓋以聲為佛事雄樓傑閣宛在水之中央歷
歲既深須人乃復敢徧投於信士祈同結於勝緣浮翠
流丹儻復還於鉅麗撞昏擊曉實大警於沉冥

重修光孝觀疏

天覆地載之間飲啄皆由於道蔭跂行喙息之類涵濡
悉荷於國恩豈獨忠義之心人人具有抑亦生成之賜
物物皆同永惟光孝之道場實薦徽皇之颺御神祠佛
刹尚營繕之相望琳館珍臺豈修崇之可後某等叨恩

冠褐庀職宮庭敢忘夙夜之勤冀復規模之舊既侈先朝之遺迹遂新大府之榮觀

圓通寺建僧堂疏

如來香飯取時已遣化人開士鉢單展處又須得所營茲華屋延我勝流念非極棟宇之功何以稱龍象之衆木魚哮吼千僧閣也在下風露柱證明九梁星直須退步

重建大善寺疏

劫火之壞大千雖云有數長者之施億萬要豈無時儻
阿練若獲了大緣則窄堵波亦還舊觀可謂非常之舉
惟須不退之心

道像五藏疏

道雖與貌固非耳目口鼻之施天本無心尚何肝膽肺
腸之有既云肖像蓋亦同人願共發於信心不須疑著
庶亟成於盛事垂示無窮

鷲峰寺重建三門疏

建寺年深築門役鉅雖不下禪牀相接用此何為然倒騎佛殿出來少它不得伏望念古阿蘭若之勝地結檀波羅密之大緣或備土木甄甓之材或施黝堊髹丹之費初發心處已有諸聖證明一落筆時自然大地震動

重修大慶寺疏

佛出本為一大緣初無差別越城昔有六尼寺五已丘墟惟大慶之名藍實故唐之遺址茲蒙賢牧命復舊規方廣募於衆財冀亟成於偉觀魔王魔民魔女盡空蜂

蟻之區法鼓法炬法幢一新龍象之衆儻承金諾敢請
氷銜

福州請仁王堅老疏

勇退急流雖具衲子參尋之眼旁觀袖手要非邦人嚮
慕之誠爰擇名藍往迎高士某人芙蓉正派真歇諸孫
默觀已得於本心自重每輕於外物不合則去蹈儒士
之難能知我者希得老氏之所貴付越山於昨夢聽石
嶺之儻來埜鶴溪雲豈有去留之迹齋魚粥鼓一隨宿

昔之緣

福州請九峰圓老疏

開籃裏入頭不妨奇特懸崖邊撒手只要承當須遇作家方了此事某人參臨濟正法眼得補陀大辯才雖則跛跛挈挈走諸方不認昭昭靈靈作自己伏請如雲出岫似月印潭放下鉢袋衣囊打起齋魚粥鼓直到佛祖不知處猶是半塗且向父母未生前試道一句

福州請聖泉穎老疏

少室玄機陽岐正脉最端的處只要言下承當有多少
人盡向面前蹉過某人談鋒峻峭心地圓明當初向竹
筓子頭偶然築著磕著而今踞寶華王座選甚胡來漢
來便須拈起鉗鎚打開窠臼以鐵酸賺普供大衆與木
上座同演宗風鐘鼓鏗鉤播幢炳煥豈惟流輩知不由
兔徑之高要使師翁發撞破煙樓之歎

能仁請昕老疏

視世如菴摩勒果雖外物之本輕說法如優鉢曇華要

應時而出現久已名行於海內豈容身隱於雲根敬虛
金布之園往致空飛之錫某人材高龍象辯震雷霆潛
閩嶺者十年遇寒巖而一笑始初歎賞明窗下特地安
排最後慇懃鉢帑子親自分付幸念先師之遺語亟為
故人而遠來要傳無盡燈當觀第一義

雍熙請最老疏

山陰道中萬壑水依舊潺湲雲門寺裏一爐香久成寂
寞忽於旁邑得此高人某人立雪飽參隔江大悟通威

音以前消息躡毗盧向上機關血指汗顏諸方不供一
笑搏風擊水萬里始自今朝豈惟續且庵家傳更喜得
可齋道伴

鄉士請妙相講主疏

雜華設教猶日照山
大士應緣如雲出岫
某人英姿邁往雋辯
絕倫早集布金之園
久造笑雲之室伏望
俯從衆志來繼道場
且要於談笑間取上
方香積之飯然後以
神通力成夜摩覩史
之宮

千秋觀修造飯

一曲澄湖千秋古觀瓊樓玉宇正須月斧之修蓋笈琅
函未極雲章之奉至於傑閣翬飛於天半長橋虹卧於
波心皆擬繕營用成絕勝況丞相肇新於真館與邦人
仰禱於帝齡覆載之間共陶化日髮膚之外皆是聖恩
願垂不朽之名更效無疆之祝

光孝請廓老疏

孤峰頂上一口吞三世如來七里瀨邊隻手接十方衲

子既是隨緣自在便須信手承當某人號真作家有大
力量拈起拂子且與陸大夫同舉宗風放下鉢囊不妨
陳尊宿暫為隣舍

雍熙請機老疏

諸方到處只解抱不哭孩兒好漢出來須會打無麵餽
飢舉起一枝拂子勘破四海禪和某人心地超然談鋒
偁甚最初遊歷倒却門前刹竿末後承當分付先師鉢
袋十年涵養一旦闡揚請木上座作先馳拈鐵酸踈施

大衆鯨鐘鼉鼓無非塗毒家風
蘿月谿雲盡是放翁供養

雍熙請錫老疏

瞿唐峽湫湏堆萬里不生寸草
若耶谿雲門寺三人即是鼓林
要看雲居錫上座點檢諸方
須與宣城陸大人激揚此事
某人得來孤峻用處縱橫
巍巍堂堂灑灑落落半月
品戴起簪子好泉亭脫下
草屨水宿山行平日只成
露布刀耕火種從今別是生涯

求僧疏

掀禪床拗拄杖雖屬具眼厮兒搭袈裟展鉢盂却要護
身符子伏望尊官長者達士通人共燃續慧命燈不惜
判虛空筆起難遭想結最勝緣向僧堂前喝參幸離俗
諦以此丘身得度敢負厚恩

又

佛有八萬四千法門出家最勝僧受二百五十戒利
物無邊方今雲門諸山莫如淨智一境必度優婆塞俾

成比丘僧巍巍堂堂聿觀龍象之衆雍雍肅肅不媿梅
檀之林儻許結緣垂淑筆

紫霄宮女童徐居慶求披戴疏

雲山棲隱雖從金門羽客之遊冠珮焚修尚欠白水真
人之力敢輸微懇仰叩高閣伏望推博施之心植衆妙
之本仙槎乞得支機石既遇有緣天風飄下步虛聲是
為報德

成都大聖慈寺念經院僧法慧為行者雷印定求

度牒疏

拈華會上正法眼雖是自明刻草殿前護身符少伊不
得故鄉踰八千里路空手要七十萬錢欲辦大緣莫嫌
俗氣從此鉢盂兩度濕受賜不貲忽然平地一聲雷酬
恩有在

雍熙請倫老疏

脩竹茂林久作蘭亭之客青鞵布韉忽尋秦望之盟此
有宿因寧容力避某人渡河香象跋浪長鯨初得法於

室中耳聾三日晚抽身於林下壁觀九年道價雖高世緣未契方公言之共歎亦勝地之將興百草頭祖師本來知見一毫端寶刹今日神通但辨肯心必無難事

梁氏子求僧疏

名家有千里駒本意折一枝桂忽厭魯章甫擬著僧伽黎可謂人英堪承佛種長者若能成就故翁為作證明
孫餘慶求披戴疏

孤雲埜鶴山林自屬閑身布襪青鞵巾褐本來外物伏

念心久游於塵外迹尚寄於人間傳翕雖然頭戴道冠
王恭終要身披鶴氅直須白水真人力共了青谿道士
緣

陶山菴行者求化度牒疏

昔於如來所發心蓋非一世今以比丘身得度夫豈小
緣況貞白先生昇僊之區實文昌左轄植福之地遍投
信施庶獲圓成七條九條二十五條儻無魔障一佛二
佛百千億佛當共證明

傳妙鉢求僧疏

四十劫前記作佛已定出家百尺竿頭坐底人正須進
步茲述悽悽之請敬趨赫赫之門伏望王公大臣長者
居士揮雲煙於紙上運財寶於庫中出現優鉢曇花成
就僧伽黎相十方諸佛同聲讚可謂勝緣一日鉢盂兩
度開敢忘大施

葉可忻求僧疏

七寶布施作福止屬有為一人發心歸源方名大事非

賴賢豪之助曷弘清淨之緣所冀見聞各懷喜捨續佛
壽命成必芻不壞之身為國焚修効芥石無疆之祝

鎮江謁諸廟文

某以隆興改元夏五月癸巳自西府掾出佐京口明年
春二月己卯至郡洪惟上恩不可量數敢不夙夜祇惕
圖稱所蒙區區之心神其監之

祭富池神文

某去國八年浮家萬里徒慕古人之大節每遭天下之

至窮登攬江山徘徊祠宇九原孰起孤涕無從雖薄奠之不豐冀英魂之來舉

福建謁諸廟文

某聞聰明正直神之所以為神也靖共爾位好是正直吏之所以事神也一戾於此神且殛之其何福之敢望某蒙恩出使一道告至之始祇慄於祠下

福州城隍昭利東嶽廟祈雨文

代

閩之風俗祭祀報祈比他郡國最謹以故祠廟之盛甲

於四方斧斤丹堊靡有遺巧重門傑閣煥然相望則神
之所以福其人者亦宜與他郡國異而自夏訖秋驕陽
為害水泉淺涸草木焦卷多稼彌野將茂而槁夫幽顯
之際雖遠然豈有享其奉而不恤其害者惟神聰明宜
動心焉

福州謝雨文

代

吏受命天子牧養百姓神受命上帝保衛一方其責則
均然而祠宇貌像孰與府寺之雄犧牲醪幣孰與廩餼

之厚巫覡尸祝孰與官屬之盛吏隋政紕無以格豐年之祥不自責而望神宜拒而弗享矣區區之禱曾未信宿雲興東山之麓雨被千里之內雷發而不怒風行而不疾祁祁霖霖如哺如乳起視四野莫不霑足愁歎之聲變為歡謠嗚呼吏之愧於神多矣酒冽牲肥樂歌送迎匪報也以識吏之愧也

福州準赦禱諸廟文

代

乙未詔書慈寧殿服樂數大有於四方分命郡國禱山

川神示之在典祀者惟神受職欽承上意

福州歐冶池龍鰓谿河口五龍廟祈雨祝文代

繚垣閔宇瀦水灌木窈然而幽陰者龍之神也升天御
雲濟世澤物霈然而成功者龍之仁者也聰明正直有
禱必應者又其所以食於民也歷時不雨災盛將害則
龍亦何心視民之窮如越人之視秦也變化呼吸轉灾
為豐在龍之力其易如指之屈伸也犧牲醪幣吏之所
以報龍者其敢怠而弗親也

福州閩王閩忠懿王祈雨祝文

代

維神之生禦灾捍患有功德於此邦之人沒而祀之非獨父老子弟不忘神之功德意者神亦眷眷於此邦沒而不已也歷時不雨稼穡將害吏雖不言神其忍安視弗掄邪雖然敢不以告

嚴州謁諸廟文

新定為郡地陋民貧而回祿馮夷數見譴告布邑蕭然至今未復某蒙恩來守是邦宜知所報如或黷貨以厲

民淫刑以飾怒事燕遊以廢政納請謁以撓法是宜即
罪於有神死不敢悔使其能羸踐今茲之言則神亦宜
哀矜之調節雨暘驅逐癘疫使與吏民仰戴明神之休
牲酒鼓歌以時來報豈不幽顯各得其職哉

謁大成殿文

某聞之夫子曰言不忠信行不篤敬雖州里行乎哉某
家世山陰被命來守不三舍而至殆與古之仕於其國
者無以異然一於忠敬有所不力則吏與民且合其智

詐澆浮以欺其守豈不殆哉視事之始款謁先聖先師
非獨以令甲也敢告夙夜祇懼之意

謁社稷神文

某蒙上恩來守新定邦雖小有社稷焉其敢不恪以獲
戾於神敬以到郡之三日周視壇壝

嚴州秋祭祝文

秋有祀國之典也筮日之良爰舉祀事牲酒樂歌靡敢
不飭惟爾有神來格來歆惠我吏民神亦永饗典祀

嚴州祈雨祝文

新定為郡介於谿山之間雨暘少愆輒能病稼戊申水
溢方禱於神會未再旬復以旱告吏政無以格陰陽之
和而惟神之瀆羣趨廟庭僕僕亟拜神固不以吏罪而
棄斯民吏獨無愧於神乎尚力厥事以蓋茲媿神其監
臨之

又

甲辰詔旨以閔雨命郡守致禱惟神受職欽承上命

又

某被命來守幸及終更不敢以去郡有期急荒厥事屏
逐暴吏慰安疲民稽於幽明儻逭咎責而嘉穀方秀時
雨未渥維神正直宜監於茲敢列忱辭恭俟嘉澤

嚴州馬目山祈雨祝文

維神有祠茲山尚矣唐刺史韓泰以禱雨獲應載新廟
貌今又四百餘年而未列命祀無以慰父老祝史之心
今茲旱勢已極某雖愚蒙恩假守得以專達於朝敢與

爾神期以三日甘澤霑足槁苗復興當列奏乞封以侈
神之威靈顧以守郡不獲親行謹遣迪功郎建德縣主
簿汪仲儀即事祠下而某帥郡僚望拜於軍門偃以俟
命

又

考於圖志得神之威靈而致禱焉既累日矣誠弗能格
雖間得小雨地不及濡塵不及歛而赫日復出矣然父
老之言以為比夕雲物多起神之祠傍意者神哀憫斯

民終有以活之也敢復以請悽悽之誠神尚鑒之

嚴州祈晴祝文

雨勢未止溪流暴溢民廬官寺倉庫獄戶皆有意意外之憂惟神聰明亟俾開霽約束漲水以時返壑某與吏民其敢忘報

嚴州謝雪祝文

四時冬為元英閭里母虞於癘疫平地尺為大雪麥禾預卜於豐穰敢忘薄薦之陳少畬明神之賜尚祈孚佑

永保安寧

嚴州久雪祈晴祝文

雪雖嘉瑞過則為災春氣未和民屢告病郡政乖刺惟神之歸尚祈興哀以卒大賜牲酒之報其敢弗虔

嚴州廣濟廟祈雨祝文

不雨且再旬矣井泉涸竭蔬菽告病閭巷講救焚之備郡庭決爭汲之訟秋陽益熾疾癘將作吏雖愚猶知恐懼豈神之聰明而忘之乎出雲興雨以一洗之神之德

於斯民豈有既哉

嚴州謝雨祝文

比承詔旨致禱靈祠果遂感通沛然甘澤敢涓吉日祇
報靈休

嚴州戊申謝蠶麥祝文

乃者蠶老而未繭麥秋而未穫天作霖雨將害於成惟
神降康陰沴消弭牲登於俎酒湛於觴維以薦誠匪敢
言報

渭南文集卷二十四

欽定四庫全書

渭南文集卷二十五

宋 陸游 撰

夔州勸農文

仰惟天子臨遣牧守每以務農勸課之指丁寧訓敕雖遐陬僻邑如在畿甸惟懼一穀之不登一夫之失職也
硤中之郡夔為大具於奉明詔以倡屬郡慰齊民者尤不敢不勉繼自今不縱培植不長囂訟不傷爾力不奪

爾時爾父兄子弟具亦恭承天地惠澤母為隋遊母息東作母息收歛母嫚蓋藏勤以殖產儉以足用有司與民交致其愛使公私之蓄日以富饒無貽朝廷宵旰之憂豈不難哉

丁未嚴州勸農文

蓋聞農為四民之本食居八政之先豐歉無常當有儲蓄吾民生逢聖世百穀順成仰事俯育各遂其性太守幸得以禮遜相與從事於此故延見高年勞問勸課致

誠意以感衆心非特應法令為文具而已今茲土膏方
動東作維時汝其語子若孫無事末作無好終訟深畎
廣耜力耕疾耘安豐年而憂歉歲太守亦當寬期會簡
追胥戒興作節燕遊與吾民共享無事之樂而為後日
之備豈不美哉

戊申嚴州勸農文

蓋聞為政之術務農為先使衣食之麤充則刑辟之自
省當職自蒙朝命來剖郡符雖誠心未格於豐穰然拙

政每存於撫字觴酒豆肉曷嘗妄蠹於邦財銖漆寸絲
不敢輒營於私利所冀追胥弗擾墾闢以時春耕夏耘
仰事俯育服勞南畝各終蓊蓂之功無犯有司共樂舒
長之日今者土膏既動穡事將興敢延見於耆年用布
宣於聖澤清心省事固守令之當為曠土游民亦父兄
之可恥歸相告戒恪務遵承上以寬當宁之憂憂下以
成提封之美俗

書通鑑後

司馬丞相曰天地所生財貨百物止有此數不在民則在官其說辯矣理則不如是也自古財貨不在民又不
在官者何可勝數或在權臣或在貴戚近習或在強藩
大將或在兼并或在老釋方是時也上則府庫殫乏下
則民力窮悴自非治世何代無之若能盡去數者之弊
守之以悠久持之以節儉何止不加賦而上用足哉雖
捐賦以予民吾知無不足之患矣彼桑弘羊輩何足以
知之然遂以為無此理則亦非也

又

周世宗既服江南諭使修守備通鑑以為近於大邦畏其力小邦懷其德是比之文王也方是時世宗將有事於燕晉其謀以為若南方有變雖不能為大害然北伐之師勢亦不得不還故先思有以安江南之心又疲其力於大役使不得動此北伐成功江南折簡可致矣此世宗本謀也遽謂之近於文王豈不過哉然世宗之謀則誠奇謀也蓋先取淮南去腹心之患不棄勝取吳蜀

楚粵而舉勝兵以取幽州使幽州遂平四方何足定哉
甫得三關而以疾歸則天也其後中國先取蜀南粵江
南吳越太原最後取幽州則兵已弊於四方而幽州之
功卒不成故雖得諸國而中國之勢終弱然後知世宗
之本謀為善也

書賈充傳後

言一也情則三也其惟論兵乎自古惟用兵最多異論
以其有是三者也禍機亂萌伏於隱微人知兵之利不

知有害有識者焉逆見而力止之王猛之於秦是也投機之會轉盼已移而常人闇於事機私憂過計馮道之於周是也猛固賢矣道雖闇猶有憂國之心焉至於賈充當晉武時力沮伐吳之舉至請斬張華則何說哉自漢之季百數十年間庸人習見南北分裂謂為故常赤壁之役以魏武之雄乘破竹之勢而大敗塗地終身不敢南鄉充之心蓋竊料吳未可下因為先事之言以徼後日之福而不料天下之遂一也要之戰危事也以舜

為君禹出師不能一舉而定三苗以唐太宗自將李勣
在行不能遂平區區之高麗故為充之說者常有利焉
此人臣之陰為身計者所以多出於此也馮道不足言
矣王猛賈充之論所謂差毫釐而謬千里者可不察哉
書郭崇韜傳後

後唐莊宗初得天下欲立愛姬劉氏為后而韓夫人正
室也伊夫人位次在劉氏上莊宗雖出夷狄又承天下
大亂禮樂崩壞之際然顧典禮人情亦難其事未知所

出羣臣雖往往阿諛亡學術然亦無敢當其議者豆盧革為相郭崇韜為樞密使崇韜功高迹危思為自安計而革庸懦無所為惟諂崇韜以自安因相與上章言劉氏當立於是莊宗遂立劉氏為后劉氏既立黷貸蠹政殘賤忠良天下遂大亂莊宗以弑崩李氏之子孫殲焉嗚呼革不足言矣崇韜佐命大臣忠勞為一時冠其請立劉氏非有他心也不過為天子所寵昵而自結焉將賴其助以少安而已然唐之亡實由劉氏是亡唐者崇

韜也後唐之先皆有勲勞於帝室晉王克用百戰以建
王業莊宗因之遂有天下同光之初海內震動幾可指
麾而定矣而崇韜顧區區之私引劉氏以覆其社稷而
滅其後嗣宗廟之靈其肯赦之乎崇韜卒以盡忠赤其
族革亦無罪誅死豈不天哉昔唐高宗欲立武昭儀為
后大臣褚遂良等力爭以為不可者皆得禍獨李勣勸
成之窮極富貴而死自謂得計矣及武氏得志唐高祖
太宗之子孫誅戮幾盡而勣雖已死亦卒以孫敬業故

發墓剖棺夷其宗族遂良等雖得禍不至此也天理之不可逃如此雖然豈獨天理哉彼勣與崇韜皆武夫烈士勇於報德乃以此心揣婦人以為自安之奇策安知婦人之性陰忮忍毒果於背德方其得志自肆若豺虎然豈復思得立之所自哉然則二人之禍雖微天理固有不可逃者矣悲夫

書安濟法後

當安濟法行時州縣醫工之良者憚於入坊越州有

庸醫曰林彪其技不售乃冒法代它醫造安濟今日傳
容當來則林彪也明日丁資當來又林彪也又明日僧
寧當來亦林彪也其治疾亦時効遂以起家然里巷卒
不肯用比安濟法罷林彪已為溫飽家矣年八十餘乃
終開禧乙丑四月七日移觀書

書空青集後

建中靖國元年景靈西宮成詔丞相曾公銘於碑以詔
萬世碑成天下傳誦為宋大典且數曾公耆老白首而

筆力不少衰如此建炎後仇家盡斥曾公文章始行於世而獨無此文或謂中更喪亂不復傳矣淳熙七年某得曾公子寶文公遺文於臨川然後知其寶文公代作蓋上距建中八十年矣嗚呼文章鉅麗闕偉至此使得用於世代王言頌成功施之朝廷薦之郊廟孰能先之而終寶文公之世士大夫莫知也汪翰林平生故人及銘其墓惟曰始為家賢子弟中為時勝流晚為能吏是豈足以言公哉公家世固以文章名天下人自少時所

交皆諸父客天下偉人出入試用亦數十年朋舊滿朝
猶世猶不盡知之如此況山林之士老於布衣所交不
出閭巷其埋沒不耀抱材器以死者可勝數哉可勝歎
哉九月十九日山陰陸某書

書浮屠事

浮屠師宗杲宛陵人法一汴人相與為友資皆豪傑負
氣好遊出入市里自若己乃折節同師蜀僧克勤相與
磨礪浸灌至忘寢食遇中原亂同舟下汴杲數視其笠

一怪之伺杲起去亟視笠中杲有一金釵取投水中杲還亡金色頗動一叱之曰吾期汝了生死乃為一金動邪吾已投之水矣杲起整衣作禮曰兄真宗杲師也交益密於虜世多詆浮屠者然今之士有如一之能規其友者乎藉有之有如果之能受者乎公卿貴人謀進退於其客客之賢者不敢對其不肖者則勸之進公卿亦以適中其意而喜謀於子弟亦然一旦既禍其客其子弟則曰使吾公早退可不至是而公卿亦歎曰向有一

人勸吾退豈至是哉然亦晚矣

書渭橋事

中大夫賈若思宣和中知京兆櫟陽縣夏夜以事行三十里至渭橋夜漏欲盡忽見二三百人馳道上衣幘鮮華最後車騎旌旄傳呼甚盛若思遽下馬避於道傍民家且使從吏詢之則曰使者來按視都城基漢唐故城王氣已盡當求生地此十里內已得之而水泉不壯今又舍之矣語畢馳去如飛時方承平若思大駭明日還

縣亟使人訪諸府則初無是事也若思河朔人自櫟陽
從蔡靖辟為燕山安撫司管勾機宜文字靖康中自燕
遯歸入尚書省為司封郎而卒陸某曰河渭之間奧區
沃埜周秦漢唐之遺跡隱顯故在自唐昭宗東遷廢不
都者三百年矣山川之氣鬱而不發藝祖高宗皆嘗慨
然有意焉而羣臣莫克奉承予得此事於若思之孫逸
祖豈關中將復為帝宅乎夷暴中原積六七年腥聞
於天王師一出中原豪傑必將響應決策入關定萬世

之業茲其時矣予老病垂死懼不獲見故私識若思事以示同志安知士無脫輓輅以進說者乎

書包明事

包明者不知其鄉里少為兵事湯岐公自樞密至左相明常在府紹興末岐公以御史論罷故例一府之人皆罷過拜執政則往事焉久之御史中丞汪公澈拜參知政事一府皆往汪公蓋前日劾岐公者也於是明獨不肯往曰是嘗論擊吾公者持何面目事之雖妻子飢寒

不之顧未幾以病死方岐公貴時所薦達士大夫多矣
至其失勢不反噬以媚權門者幾人且岐公平日待明
非有異於衆人也汪公之拜一府俱往非獨明也明而
往事汪公非有負也泥塗賤隸又非清議所及而其自
信毅然不移如此蓋有古烈士之風矣書其始末使讀
者有感焉

書神僊近事

昔道士侯道華喜讀書或問其意答曰天上無凡俗神

僊後果騰舉而去呂洞賓陳搏賀元施肩吾皆本書生
近歲有譙定雍孝閔尹天民亦皆以儒士得道定今百
二十餘歲故在青城山中采藥道人有見之者讀易尚
不輟也孝閔或自稱木先生往來沔鄂間天民客青城
儲福宮一日大罵所與往來道士即閉門睡道士明旦
相率謝之而門不啓壞壁視之危坐死矣方相與驚歎
俄失所在此三人者皆顯人故其事傳閭巷山澤之士
名迹湮晦本不為人知者又可悉數哉予從子慧綽為

浮屠為予言豫章西山香城寺之傍有竺人身被綠毛
每雨霽多坐石上暴日見人輒避去追之不可及有識
者曰此馬祖弟子亮座主者乃知長生久視之道人人
可以得之初不必老氏之徒也因書置座右以自勵云

書屠覺筆

建炎紹興之間有筆工屠希者暴得名是時大駕在宋
都在廣陵又南渡幸會稽錢塘希嘗從駕自天子公卿
朝士四方士大夫皆貴希筆一筒至千錢下此不可得

晁侍讀以道作詩稱譽之有吳先生師中字茂先得其
筆以一與先少師希之技誠絕人入手即熟作萬字不
少敗莫能及者後七十餘年予得其孫屠覺筆財價百
錢入手亦熟可喜然不二百字敗矣或謂覺利於易財
而速售是不然價既日削矣易敗則人競趨它工覺固
不為書者計獨不自為計乎乃書希事庶覺或見之

書二公事

鄭价夫名俠以剛直名天下晚居福清自號一拂居士

布衣糲食而雜植華木於舍傍觴詠自適客至必與飲食不過五爵蔬果之外一肉而已遇貧士過者亦薄贐之止於千錢飲具皆白鑊或遺以銀盃辭不取好強客奕棊有辭不能者則留使旁觀而自以左右手對局左白右黑精思如真敵白勝則左手斟酒右手引滿黑勝反是如是幾二十年如一日謝昌國名諤嘗聞道於頤正郭先生居臨江名其廬曰艮齋晨興烹豆腐菜羹一釜偶有肉則縷切投其中客至亦不問何人輒笑食有

貧士及醫卜之類飯已輒語之曰吾無錢子君豈欲詩
乎取幅紙作絕句贈之以為常二公皆予所鄉慕也予
貧甚欲學介夫辦五孟千錢亦復未易又不解奕棊或
可力貧學昌國耳書之座右當徐圖之紹熙之元十二
月八日九曲老樵書

渭南文集卷二十五

欽定四庫全書

渭南文集卷二十六

宋 陸游 撰

真廟賜馮侍中詩

某家藏藏孝嚴殿繪像先正侍中馮公在焉冠劍偉然
與太行黃河氣象相埒每稽首歎首侍中輔相兩朝更
天下大變而社稷尊安夷狄讐服鉏耰萬里無犬吠之
警有以也夫晚待罪新定公之孫頎出示章聖皇帝賜

詩又以想見一時盛事恨不生其時俯伏沙隄旁窺望
風采云

高宗聖政草

某被命修光堯皇帝聖政草勅凡例網羅放逸雖寢食
間未嘗置也然不敢以稿留私篋暇日偶追記得此命
兒輩錄之隆興二年十月一日左通直郎通判鎮江軍
府事陸某記

高宗賜趙延康御書

右知金壇縣趙君師懋錄高宗賜其大父延康公書及
延康移偽楚書笑為一編以示史官陸某其曰延康在
宣和靖康間聲望風采震曜一時及守宛丘百戰禦狂
寇卒全其城視唐代張巡許遠顏真卿皆過之來朝行
在高皇蓋欲以左轄命之議者謂宗室輔政非故事遂
止方公之南徙也謝表有云臣本支百世侍從三朝又
云堅壁以保近畿慨前功之俱廢登壇而陪盛禮懷曩
遇以自憐讀者悲之某又嘗於公從孫師嚴有翼家見

公建炎奏議稿一編皆人所至雖言者不知此稿皆在
鑑堂集中否或可訪於有翼院中以補逸遺敢併以告
嘉泰癸亥歲三月丙申臣某謹識

高皇御書二

臣某少時與胡尚書之子杞同學於雲門山中見高皇
帝賜尚書御題扇曰文物多師古朝廷半老儒蓋黃體
也與此手詔絕相類後數年蒙收召得面天顏距今四
十四年矣伏讀寶涕不知所云嘉泰癸亥五月一日史

官臣陸某謹題

又

臣某伏覩高皇帝御天下幾三十年進用諫官御史皆出聖選故往往躡至相輔其不合者猶為侍從乃去如施公財任遺補即出守小郡蓋無幾人則具犯顏拂指不撓於權倖可以想見而上之知人受盡言有仁祖用范仲淹唐介之風矣惜乎施公遽逝去不及召用於序悲夫開禧乙丑九月一日故史官陸某謹書

今上皇帝賜包道成御書崇道菴額

開禧某年某月甲子皇帝親御翰墨書崇道菴三字賜妙行先生臣包道成以示故史官臣陸某將刻之石具載歲月及被賜之由示天下後世臣某竊聞臣道成實晉陵人少學黃老之說以劬身濟衆為事寓跡都城三十餘年築堂以居凡以黃冠褐衣至者靡不館之往來千人蓋嘗有神僊異人混於衆中道成獨默識之而不言會稽光孝觀故名乾明天聖間章獻明肅皇后遣中

使築之久壞不葺道成談笑復其舊凡都城橋梁道路
皆力治之費至緡錢百餘萬建東嶽廟吳山上即成又
即其傍築室以奉真武又江右湖氣象雄麗而道院屹
立於廡外鐘磬步虛之聲在雲霄間都人為之心駭神
竦於是皇帝聞而異之故有扁榜之賜臣某犬馬之年
駸駸九十獲在聖主仁壽域中且嘗獲紬繹三朝金匱
石室之藏今雖薦老猶幸未病廢得以紀稀濶盛事豈
非幸哉開禧二年歲在丙寅三月某日太中大夫充寶

謨閣待制致仕山陰縣開國子食邑五百戶賜紫金魚袋臣陸某昧死稽首再拜謹書

跋尹耕師書劉隨州集

傭書人韓文持束紙支頭而睡偶取視之劉隨州集也乃以百錢易之手加裝褫紹興二十五年正月八日陸某記

尹耘師耕鄉里前輩與九伯父及先君游此集蓋其手抄云紹熙元年七月望某再跋

跋唐御覽詩

右唐御覽詩一卷凡三十人二百八十九首元和學士
令狐楚所集也按盧綸墓碑云元和中章武皇帝命侍
臣采詩第名家得三百一十篇公之章句奏御者居十
之一今御覽所載綸詩正三十二篇所謂居十之一者
也據此則御覽為唐舊書不疑然碑云三百一十篇而
此纔二百八十九首蓋散逸多矣姑校定訛謬以俟完
本御覽一名唐新詩一名選集一名元和御覽云紹興

乙亥十一月八日吳郡陸某記

跋文武兩朝獻替記

學者當以經綸天下自期此書不可不見也但傳本繆誤幾不容讀以它書尋繹之十得四五云紹興丙子臘日務觀題

跋杲禪師蒙泉銘

右妙喜禪師為良上人所作蒙泉銘一首往予嘗晨過鄭禹功博士坐有僧焉予年少氣豪值據上坐時方大

雪寒甚因從禹功索酒連引徑醉禹功指僧語予曰此妙喜也予亦不辭謝方說詩論兵旁若無人妙喜遂去其後數年予老於憂患志氣摧落念昔之狂痛自悔責然猶冀一見作禮懺悔孰知此老遂棄世而去邪雖然良公蓋一世明眼衲子不知予當時是即今是試為下一轉語隆興改元十一月五月笠澤漁隱陸某書

跋修心鑑

右高祖太傅公修心鑑一篇初公生七年家貧未就學

忽自作語有神僊語觀者驚焉晚自號朝隱子嘗退朝見異人行空中足去地三尺許邀與俱歸則古僊人嵩山栖真施先生肩吾也因受鍊丹辟穀之術尸解而去然其術祕不傳今惟此書尚存某既刻版傳世并以七歲吟及自贊附卷末庶幾薦志方外之士讀之有所發焉亦公之遺意也隆興二年七月二日元孫某謹書

跋邵公濟詩

先子入蜀時與邵子文遇於長安同遊興慶池有詩倡

酬相得驩甚夜讀公濟詩超然高逸恨未嘗得講世舊
與文盟也乾道元年五月十八日笠澤漁隱陸某書

跋坐忘論

司馬子微師體玄先生潘師正體玄師昇玄先生王遠
知昇玄師貞白先生華陽隱居陶弘景故體玄語子微
曰吾得隱居正一法逮汝四世矣乾道二年天慶節偕
玉隆藏室本傳漁隱子手記

跋查元章書

李份事士大夫謹以故得書帖多不可數然閱其書至不敢與他札偕藏者元章吏部一人而已份一吏耳知敬元章如此豈知元章仕於朝既不容去而居幙府又不容自引於數千里外赤甲白鹽之間乃少安嗚呼亦可數也夫丙戌上元後三日漁隱書

跋高象先金丹歌

右玉隆萬壽觀本序言有注解而不傳亦不知序者為何人也丙戌二月八日務觀書

又

國初有高象先淳化中為三司戶部副使少從戚同文
學與宗度許讓陳象與郭成範王礪膝涉齊名不言其
所終亦不知其鄉里恐即此人然序言名先字象先又
似別一人神仙隱顯不可必知聊記之耳辛亥炊熟日
書

跋天隱子

最後易簡漸門二說非天隱子本語他日錄本當去之

丙戌三月中休傳本於玉隆萬壽宮漁隱

東坡先生以為天隱子真司馬子微所著也傳本後二十五年紹熙庚戌冬至日書

跋造化權輿

先楚公著埤雅多引是書然未之見也乾道三年百夏十八日傳自玉隆藏室甫里陸某謹題

跋老子道德古文

右漢嚴君平著道德經指歸古文此經自唐開元以來

獨傳明皇帝所解故諸家盡廢今世惟此本及貞觀中
太史令傳爽所校者尚傳而學者亦罕見也予求之踰
二十年乃盡得之玉笈藏道書二千卷以此為首漁隱
陸某題乾道二年十月十日

跋卮菴語

乾道庚寅十月入蜀舟過公安二聖見祖珠長老得此
書珠自言南平軍人得法於卮菴云

跋武威先生語錄

豐清敏公為中執法論事上前曰司馬光呂公著皆忠賢何為引赦復官赦當及有罪耳無罪何赦也徽祖曰光等變先帝法度非罪乎清敏公頓首曰誠當變無可罪者方元符建中間衆正畢集於朝天下喁喁相望太平清敏公與陳忠肅公俱極諫官御史之選而所以言則有婉直之異吾先大父楚公每以為二公之論皆不可廢蓋忠肅似孟子說齊而清敏似伯夷諫周其歸一也今觀武威先生之論又甚似清敏百世之下志士仁

人得此書讀之當有太息流涕者矣乾隆七年立秋日
山陰陸某書

跋關著作行記

著作關公出使夾中風采峻甚仕者人人震慄莫敢仰
視某以孤生起皐籍萬里佐州淺闇滯拙自期且汰去
而關公獨厚遇之舉酒賦詩談臺閣舊事忘其位之重
也公免歸之明年某以事至卧龍山咸平寺長老惠璉
言公往有行記今將刻之石因屬某書其末某曰方關

公之門可炙手時此書伏不出今公歸卧青城山中賓客解散形勢一變而璉方刻其書為不朽計嗟乎足以愧士大夫矣乾道七年七月七日左奉議郎通判夔州軍州主管學事陸某謹識

跋司馬子微餌松菊法

乾道初予見異人於豫章西山得司馬子微餌松菊法文字古奧非妄庸所能附託八年又得別本於蜀青城山之丈人觀齋戒手校傳之同志十二月六日笠澤漁

翁陸務觀書於玉華樓

跋周茂叔通書

濂谿之生也世但以佳士許之耳既死蒲左轄作誌黃太史作詩其稱述亦不過如此向使無二程先生後世豈知濂谿為大儒傳聖人之道者邪以此知士之埋沒無聞者何可勝計乾道壬辰十二月十五日成都驛南窓書

跋岑嘉州詩集

予自少時絕好岑嘉州詩往在山中每醉歸倚胡床睡輒令兒曹誦之至酒醒或睡熟乃已嘗以為太白子美之後一人而已今年自唐安別駕來攝犍為既畫公像齋壁又雜取世所傳公遺詩八十餘篇刻之以傳知詩律者不獨備此邦故事亦平生素意也乾道癸巳八月三日山陰陸某務觀題

跋二賢像

右孟貞曜歐陽率更二像皆唐人筆墨北湖者吳則禮

子傳也無悔者劉焘無言也最後實先君會稽公茶山先生曾文清公書萬里羈旅不自意全撫卷流涕乾道九年九月既望刻石置漢嘉月榭上山陰陸某識

跋山谷先生三榮集

予集黃帖得贈元師及王周彥三詩甚愛之有黃淑者家三榮見而笑曰紹興中再刻本也舊石方黨禁時已磨毀矣乃出此卷曰是舊石本其筆力精勁蓋如此因錄藏之淳熙之元二月二日務觀書

跋硯錄香法

硯錄舊有本而亡之香法蓋未之見師房者濟南衛昂也娶婆婆先生崔德符女晚官已硤死焉乾道辛卯冬予得此編於巫山縣師房手鈔也已腐敗不可讀乃錄藏之後三年淳熙之元二月三十日蜀州漱玉南窓務觀書

跋唐修撰手簡

某之曾外大父質肅唐公守并州故給事中呂公實為

幙客質肅為人方嚴少許可或面折人臨川王和甫同
時在幙中每言見唐公退輒汗滿握然遇吕公特歡他
客莫敢望也淳熙元年某在蜀州得質肅仲子修撰公
與給事手帖讀之蓋元祐初修撰使河北給事為御史
時也書論黃河市易辭指激烈無一語及其私與世俗
責報父客至有違父者何其遠哉修撰字君益元祐中
建議棄渠陽城紹聖初坐貶團練副使元符建中之間
起守許昌方治事得報召蔡京撫案憤咤即日疽發背

卒其不及拜公而先夫人為言公大節如此敢併記之以遺給事之孫教授君云七月二十三日山陰陸某謹書

跋蔡君謨帖

近歲蘇黃米芾書盛行前輩如李西臺宋宣獻蔡君謨蘇才翁兄弟書皆廢此兩軸君謨真行草隸皆備石在仙井可寶也淳熙元年九月八日蜀州手裝

跋瘞鶴銘

瘞鶴銘予親至焦山摹之止有此耳殘璋斷珉當以真
為貴豈在多邪淳熙之元九月一日蜀州重裝

跋西崑酬唱集

通直郎張玠河陽人呂汲公家外甥藏書甚富淳熙二
年正月八日夜讀此集燈架忽仆壞書時傳畢方一日
豈歐尹諸人亦有靈邪記之為異時一笑

跋歷代陵名

三榮守送來近世士大夫所至喜刻書版而略不校讎

錯本書散滿天下更誤學者不如不刻之愈也可以一歎淳熙乙未立冬可齋書

跋溫庭筠詩集

先君舊藏此集以華清宮詩冠篇首其中有早行詩所謂雞聲茅店月人跡板橋霜者久已墜失得此集於蜀中則不復見早行詩矣感歎不能自己淳熙丙申重陽日某識

跋王君儀待制易說

王公易學雖出於葆光張先生然得於心者多矣建炎間敵騎在錢塘明越俱陷王公端居於嚴曰敵決不至此且狼狽而歸自此窮天地不復渡江矣其妙於易數蓋如此淳熙丁酉元日山陸陸某書於錦官閣下

跋崔正言所書書法要訣

德符詩名一代書則未之見也觀此編中字瘦健有神采亦類其詩乃知前輩未易以一技名也戊戌重午務觀書

跋後山居士詩話

談叢詩話皆可疑談叢尚恐少時所作詩話決非也意者後山嘗有詩話而士之妄人竊其名為此書耳後山二子豐登登過江為會稽曹官李鄴降敵登亦被驅以北悲夫淳熙戊戌十月二十四日可齋

跋佛智與升老書

此一編佛智禪師與其法子寒巖升公書也議論超卓殆非世儒所及三復歎仰淳熙己亥三月九日建安雙

清堂書

跋古柏圖

此圖吾家舊藏予居成都七年屢至漢昭烈惠陵此柏在陵旁廟中忠武侯室之南所謂先主武侯同閼宮者與此略無小異則畫工亦當時名手也淳熙六年龍集己亥六月一日陸某識



渭南文集卷二十六

欽定四庫全書

集部

渭南文集卷

二十七至
三十一

詳校官庶吉士

臣陳若霖

主事

臣

呂雲棟覆勘

總校官知縣

臣 繆 琪

校對官典簿

臣

郭祚 熾

膳錄監生

臣

劉

坤

欽定四庫全書

渭南文集卷二十七

宋 陸游 撰

跋中和院東坡帖

此一卷皆蘇仲虎尚書所藏鑒定精審無一帖可疑者
者刻石在成都大聖慈寺中和勝相院淳熙六年六月
十七日陸務觀題

跋漢隸

漢隸十四卷皆中原及吳蜀真刻淳熙己亥集於建安
公署友人莆陽方士繇伯謩親視裝標故無一字差謬
者六月二十一日山陰陸某書

跋晁百谷字叙

名者士所願也而或懼太早何哉吾測之審矣少而得
名我不能不矜人不能不忌以滿假之心來讒慝之口
幾何其不躓也吾元歸年甫二十筆力扛鼎不患無名
患太早耳雖然漢道方力張其名而吾獨欲其退避揜

覆元歸未必樂也異時出入朝廷更歷世故會當思吾
言也夫淳熙庚子二月三日山陰陸某書

跋陵陽先生詩草

右陵陽先生韓子蒼詩草一卷得之其孫籍先生詩擅
天下然反覆塗乙又歷疏語所從來其嚴如此可以為
後輩法矣予聞先生詩成既以予人久或累月遠或千
里復追取更定無毫髮恨廼止則此草亦未必皆定本
也大歇菴詩一章徐師川作而先生手錄之亦足見其

無昔人爭名之病矣故附見卷中淳熙庚子四月二十
二日笠澤陸某書

跋荆公詩

右荆公手書詩一卷前六首贈黃慶基後七首贈鄧錡
石刻皆在臨川淳熙七年七月十七日陸某謹題

跋續集驗方

予家自唐丞相宣公在忠州時著陸氏集驗方故家世
喜方書予宦遊四方所獲亦以百計擇其尤可傳者號

陸氏續集驗方刻之江西倉司民為心齋淳熙庚子十一月望日吳郡陸某謹書

先左丞使遼語錄

右先楚公使遼錄一卷三十八伯父手書伯父自幼被疾以左手書然筆力清健如此平生凡鈔書至數十百卷云淳熙八年四月五日某謹識

跋朝制要覽

先君會稽公晚歲喜觀此書間為子弟講論因革率至

夜分先君捐官舍三十有四年統得此於故廬伏讀悲
哽敬識卷末淳熙八年龍集辛丑十一月二十五日山
陰陸某書

跋東坡問疾帖

東坡先生憂其親黨之疾委曲詳盡如此則愛君憂國
之際可知矣其曰勿使常醫弄疾天下之至言讀之使
人感歎彌日淳熙九年五月乙未甫里陸某書

跋東坡詩草

東坡此詩云清吟離夢寐得句旋已忘固已奇矣晚謫
惠州復出一聯云春江有佳句我醉墮渺莽則又加於
少作一等近世詩人老而益嚴蓋未有如東坡者也學
者或以易心讀之何哉淳熙九年五月二十六日玉局
祠吏陸某書於鏡湖下鷗亭

跋孫府君墓誌銘

方五代割裂時自一郡一上非其國子弟則大將功臣
也士大夫仕為令掾者已為達官錢氏土境尤感而孫

公至專城蓋其國顯人也觀杜公所述亦試有以得之矣淳熙壬寅立秋日甫里陸某

跋蘇魏公百韻詩

右首一卷丞相魏公謝事歸第且八十時所作也蘇端明賀趙清獻公得謝啟云念平生之百為一無可恨某於魏公亦云淳熙壬寅立秋日吳郡陸某謹識

跋家藏造化權輿

右造化權輿六卷楚公舊藏有九伯父大觀中顯字淳

熙壬寅得之故第廢紙中用別本讎校而闕其不可知者兩本俱通者亦具疏其下六月四日山陰陸某謹記後十有四年慶元元年八月十二日重校凡三日而畢時年七十一

跋三蘇遺文

此書蜀郡呂商隱周輔所編周輔入朝為史官得唐安守以歸未至家暴卒可悲也淳熙十一年正月十一日務觀識

跋兼山先生易說

郭立之從程先生遊最久程先生病革猶與立之有問
奮語著於語錄而尹彥明獨謂立之自黨論起即與程
先生絕死亦不吊祭蓋愛憎之論也立之子雍字子和
屏居峽中屢聘不起亦著易說得其家學蓋程氏易學
立之父子實傳之淳熙甲辰二月三十日甫里陸務觀
云

後六年得謝昌國所贈頤正先生辨尹公說乃知予此

言麤合也頤正即雍也已酉八月二十八日某書

跋鄭虞任昭君曲

自張文潛下世樂府幾絕吾友鄭虞任作昭君曲如羊
車春草空芊芊及重瞳光射搔頭偏之類文潛殆不死
也但願夕烽長不驚甘泉妾身勝在君王前能道昭君
意中事者淳熙甲辰三月二十三日甫里陸某書

跋傅正議至樂菴記

伏波將軍困於壺頭曳病足土室中以望夷賊左右哀

之莫不為流涕定遠侯在西域三十年年老思土上書
自言願生入玉門關詞指甚哀彼封侯富貴矣然戚戚
無聊乃如此其他盈滿輓旒畏禍憂誅願為布衣不可
得者又何可勝歎然則富貴果不如貧賤之樂邪曰此
自富貴者言之耳貧賤之士仕則無路處則無食自非
有道君子其憂又有甚者矣正議傳公在學校二十年
聲震京師同舍生去為公卿者袂相屬而公始僅得一
第既仕矣適時艱難妄男子往往起閭巷取美官公又

棄不用則亦何自樂哉及讀所作至樂菴記自道其胸
中恢疎磊落所以樂而忘憂者文辭辯麗動人有列禦
寇莊周之遺風然後知公蓋有道者或曰使天以富貴
易公之樂公其許之乎予曰公所以處貧賤者則其所
以處富貴也顏回之簞瓢周公之衮黼一也觀斯文者
盍以是求之淳熙十一年七月十一日山陰陸某識書

跋中興間氣集

高適字仲武此乃名仲武非適也評品多妄蓋淺大夫

耳其書乃傳至今天下事出於幸不幸固多如此可以歎淳熙甲辰八月二十九日放翁書

高適字仲武此集所謂高仲武乃別一人名仲武非適也議論凡鄙與近世宋百家詩中小序可相甲乙唐人深於詩者多而此等議論乃傳至今事固有幸不幸也然所載多佳句亦不可以所託非其人而廢之

跋齋驅集

此集刻版於宣和三年方是時黨禁猶未解文字蓋僅

有見者故本多誤然好事者冒法刻之亦奇矣淳熙甲辰重午日陸務觀書

跋柳州集

此一卷集外文其中多後人妄取他人之文冒柳州之名者聊且裒類於此子京

右三十一字宋景文公手書藏其從孫最家然所謂集外文者今往往分入卷中矣淳熙乙巳五月十七日務觀校畢

跋說苑

李德芻云館中說苑二十卷而闕反質一卷曾鞏乃分
修文為上下以足二十卷後高麗進一卷遂足淳熙乙
巳十月六日務觀書

跋章氏辨誣錄

徽宗皇帝盛德大度自秦漢以來人主莫能及者尤在
友愛蔡王寬貸章惇而史臣不能發明可為太息淳熙
丙午十月望陸某謹題

跋釣臺江公奏議

某乾道庚寅夏得此書於臨安後十有七年蒙恩守桐廬訪其家復得三表及贈告墓志因併刻之以致平生尊仰之意淳熙十三年十一月十有六日笠澤陸某書

先太傅遺像

先太傅皇祐中以吏部郎中直昭文館自會稽移守新定期年請老得分司西京以歸迨今百四十年而某自奉祠玉局起為是邦實繼遺躅於是知建德縣事蘇君

林以父老之請築祠宇於兜率佛寺淳熙十四年春正月丙辰備車旗儀物大合樂奉遺像於祠且以公自贊道帽羽服像刻之堅珉慰邦人無窮之思朝隱子蓋公自號云元孫朝請大夫權知嚴州軍州事陸某謹書

跋高康王墓誌

王岐公文章閎麗有西漢風而宋常山公書法森嚴實傳鍾張古學方裕陵致孝實慈極天下養故並命兩公彰顯高氏先王功烈以詔萬世可以為寵光矣中更亂

離而墨本寶藏如新殆有神物護持云淳熙十四年二月三日笠澤陸某謹識

跋半山集

右半山集二卷皆荆公晚歸金陵後所作詩也丹陽陳輔之嘗編纂刻本於金陵學舍今亡矣淳熙戊申上巳日笠澤陸某書

跋李深之論事集

唐丞相司空李公深之論事集有兩本其一本七卷無

序其一本一卷史官蔣偕作序然以序考之則偕所序蓋七卷者也淳熙戊申四月十九日笠澤陸某識

跋李莊簡公家書

李文參政罷政歸鄉里時某年二十年時時來訪先君劇談終日每言秦氏必曰咸陽憤切慨慷形於色辭一曰平旦來笑飯謂先君曰聞趙相過嶺悲憂出涕僕不然謫命下青鞵布襪行矣豈能作兒女態邪方言此時目如炬聲如鐘其英偉剛毅之氣使人興起後四十年

偶讀公家書雖徙海表氣不少衰丁寧訓戒之語皆足垂範百世猶想見其道青鞵布襪時也淳熙戊申五月己未笠澤陸某書

跋之果先生藁

肩吾文忠公四世孫博學工文章與予蓋莫逆也晚來行在諸公貴人頗知之欲引置要津有毀之者肩吾既不偶乃調桂陽令去客姑蘇未繫舟暴疾一夕死哀哉嘉父捷為人肩吾沒後數年始以進士起家淳熙戊申

秋社日放翁書

跋吳夢予詩編

山澤之氣為雲降而為雨勾者伸秀者實此雲之見於用者也子嘗見旱水之雲乎嵯峨突兀起為奇峰足以悅人之目而不見於用此雲之不幸也君子之學蓋將堯舜其君民若乃放逐顛顛娛悲舒憂為風為騷文人之不幸也吾友吳夢予橐其歌詩數百篇於天下名卿賢大夫之主斯文盟者翕然歎譽之末以示余余慨然

曰子之文具工可悲其不幸可吊年益老身益窮後世
將曰是窮人之工於歌詩者計吾吳君之情亦豈樂受
此名哉余請廣其志曰窮當益堅老當益壯丈夫蓋棺
事始定君子之學堯舜其君民余之所望於朋友也娛
悲舒憂為風為騷而已豈余之所望於朋友哉淳熙十
五年十一月二十六日甫里陸某書

跋松陵集三

淳熙十六年四月二十六日車駕幸景靈宮予以禮部

郎兼膳部檢察賜公卿食訖事作假會陵陽韓籍寄此
集來云東都舊本也欣然讀之時寓輓街巷街南小宅
之南樓山陰陸某務觀手識

此集蔡景繁舊物復嘗歸韓子蒼子蒼之孫籍以遺予
蓋百年前本也

景繁元豐中嘗為開封推官此所題開封南司者是也
景繁二子居厚居易此題居厚者其長也景繁臨川人
而韓子蒼居臨川故得此書務觀手記

跋王仲言乞米詩

仲言貸米本自欲就魯肅輩人而艮齋又戒以勿取陶
胡奴米仲言治已可謂嚴而艮齋告之亦可謂忠矣數
年來仲言以貧甚客長安中豪子資給殊厚今春忽捨
去主人叩首乞少留不可豈獨能踐初言亦不負艮齋
期待矣淳熙己酉四月二十七日陸某務觀書

跋金奩集

飛卿南鄉子八闋語意工妙殆可追配劉夢得竹枝信

一時傑作也淳熙己酉立秋觀於國史院直廬是日風雨桐葉滿庭放翁書

跋韓非子

右韓非子一卷紹興丁卯先君年六十時傳吳棫才老本後四十有二年淳熙己酉某重裝而藏之時年六十有五十月九日史院東閣手識

跋却掃編

此書之作敦立猶少年故大抵無紹興以後事淳熙己

酉十一月十四日書於儀曹直廬

跋彩選

紹興甲戌七月三日子宅過此彩選畢景丙子二月五日同季思訪務觀雲門山草堂復為此戲子宅記

紹興十九年正月十有七日友人王仲友父自京江來以是書為贈餘醺菴記

官制左右丞不為平章事自侍郎拜者皆躡遷尚書此書蓋失之

子宅季思下世忽已數年予今年六十有七覽此太息
然予方從事金丹丹成長生不死直餘事耳後五百年
過雲門草堂故趾思昔作彩戲豈非夢邪紹熙元年上
元日放翁書去子宅題字時三十年矣

跋陝西印章二

紹熙庚戌正月十九日夜閱故書得此追思在山南時
已二十年同幙惟周元吉閻才元章德茂張季長及余
五人尚亡恙爾拊卷累歎放翁題

又十有五年當嘉泰之四年歲在甲子因暴書再觀則
元吉才元德茂又皆物故數年矣季長在蜀累歲不得
書存亡有不可知者而予年已八十感歎不已八月十
六日務觀書

跋詩藁

此予丙戌以前詩二十之一也及在嚴州再編又去十
之九然此殘藁終亦惜之乃以付子聿紹熙改元立夏
日書

跋祕閣續帖張長史率意帖

此一帖在故簽書樞密王倫家倫出使時得之故都予少日嘗見之紹熙改元五月甲子甫里陸某識時年六十有六距初見時四十有五年矣

跋王深甫先生書簡二

深甫先生以治平二年七月二十八日卒而此卷末畲其弟容季書是年六月一日相距無兩月矣悲夫紹熙元年六月望陸某書

此書朝夕觀之使人若居嚴師畏友之間不敢萌一毫
不善意

跋郭德誼墓誌銘

仲晦先生識郭公墓或恨其太簡然吾夫子銘季札曰
於虜有吳延陵季子之墓財十字耳至今傳以為寶彼
賣菜求益之論可付一數紹熙二年正月二十三日陸
某謹書

又

顏魯公麻姑壇記東坡先生經藏記此有大字小字兩本蓋用羊叔子峴山故事千載之後陵谷變遷尚冀其一存爾德誼之名固自不朽然吾元晦為斯人計亦至矣豈希呂兄弟孝愛篤至有以發之邪紹熙二年正月壬申笠澤陸某識

跋郭德誼書

予童子時嘗避兵東陽山中距今六十年予長德誼三歲計其年可以相從而不及也觀此遺墨為之太息紹

熙二年正月二十三日笠澤老漁陸某謹書

渭南文集卷二十七